

Iupiter inferior Venere sit, & in sinistro Veneris quadrato, fornicatorem dicitur, illecebris mulierum, qui sæpe fallatur, corporis ornamenta inquirens, qui si quid gaudij susceperit mutata conditione illa, semper gaudia infringet.

Iouis Tetragonus ad Mercurium, si Iupiter in dextro superior illo fuerit, nati sapientiam indicat, qui sortilegia sectabitur, Geometriam, Arithmeticam, & Astrologiam discet, bonæ erit uitæ, & plurima ex aliorum munificentia suscipiet. Si uero Mercurius superior in dextro quadrati fuerit, multiplicabitur in seruis, bonum illi erit, & sua uirtute dignitatem aliquam consequetur.

Iouis quadratus ad Lunam, si Iupiter in dextro superior fuerit, & sit natale nocturnum, natus erit boni nominis, & famæ, & honoratus. Si uero Luna superior fuerit, multa decernit foelicitatis insignia, magnis Ducibus, & Regibus notum semper commendat. Sed hæc foelicitas non semper perseverat. Nam interdum patrimonij damna minatur, interdum minuit dignitatis insignia, & damna minatur, pigrosq; indicat natos.

Mars ad quadratum Solis, si Sol superior fuerit, multa mala decernit, substantiam dissipat, affert infortnium, uisum obscurat. At si Mars superior sit, peiora iudicatio. Sed in genitura diurna hæc fortius conualescunt, præsertim si iste aspectus fuerit ascendenti minaci radiatione coniunctus. Nam si Mars in occasu positus, uel in decima lumen Lunæ crescentis exceperit, tunc publica animaduersione plectetur. Idem in nocturna faciet genitura.

Martis quadratura ad Venerem, si Mars in decima fuerit, mulierum causa labores adducit. Si signum Martis mobile fuerit, erit natus instabilis in rebus agendis, ducet degenerem, uel meretricem. In natali sceminarum, indicat meretrices, si uero Venus in decima fuerit, ex his actibus uerecundiam habebit, & cælabit quæ mala conscientia perpetrauerat, & abscondet quidquid libidinibus nefarijs fecerat.

Mars & Mercurius quadrati, si Mars in dextro superior fuerit omnium maiorum causa erit talis configuratio, natum inpugnat, & aduersas indicat ualetudines, custodijs, aut carceri mancipat, horrendarum accusationum infligit discrimina, quæ mala fortiora fient in diurna genitura, in nocturna autem ex parte aliqua mitigantur. Si uero Mercurius superior fuerit, malos, maliciosos, callidos dicitur, pessima mentis cupiditate armatos, simulatores, & dissimulatores, alienæ natos custodia tradit carceri, raptores, solliciti, semper stationem quærentes, & cuius pestiferos morsus infligant, omne patrimonium, & eorum substantiam sua praua cupiditate quærentes.

Martis quadratus ad Lunam, si Mars in dextro superior fuerit, matri uiduitatem minatur, uel eam debilitatis uiribus fluxu sanguinis perimit, natus uero debilis uitæ erit, & paruæ substantiæ, eritq; hoc mendicitatis, & malæ mortis indicium. Si Mars in termino Saturni fuerit, & Luna in terminis Mercurij uel Martis, eius anima dum in corpore fuerit, malignis spiritibus dominandi tribuit potestatem. Si uero Luna superior fuerit, ignobiles reddit, laboriosos, & suarum facultatum destructores, & ad nihil idoneos, matrem ostendit abiecti generis, & inter alias calamitates malas, & superbas decernit uxores.

Solis Tetragonus ad Lunam, si sit in angulo, Sol in quouis quadrato dat dignitates, & honores, & officij alicuius potestatem, si beneuolæ uiderint eos stellæ, hæc maiora erunt. Si uero infœlices stellæ aspexerint, uitæ discrimina, & gaudia infortuniorum decernit. Si tamen in tali statu Luna feratur luminibus plena ad Iouem, aut Iupiter coniunctionem Lunæ crescentis exceperit, nobilitatis insignia maxima cum inuidia decernit. Si autem fuerit Iouis salutari præsidio destituta, fortius maleuolatum crescet improbitas.